

Neno La Mungu Lilimjia Nabii William Marrion Branham

“Yesu Kristo ni Mungu”

Sasa huo ndio ufunuo: Yesu Kristo ni Mungu. Yehova wa Agano la Kale ndiye Yesu wa Agano Jipya. Hata ujaribu kujitahidi namna gani, huwezi kuthibitisha kuna Miungu WATATU. Lakini pia inahitaji ufunuo wa Roho Mtakatifu kukufanya ufahamu ukweli kwamba Yeye ni Mmoja. Inahitaji ufunuo kuona ya kwamba Yehova wa Agano la Kale ndiye Yesu wa lile Jipya. Shetani alipenyeza kanisani na kuwapofusha watu kwenye kweli hii. Na wakati walipopofushwa kwenye jambo hilo, haikuchukua muda mrefu kufikia wakati Kanisa la Kirumi lilipoacha kubatiza katika Jina la Bwana Yesu Kristo.

Ninakiri ya kwamba inatakiwa ufunuo wa kweli kutoka kwa Roho Mtakatifu kuona ukweli juu ya Uungu siku hizi wakati tuko katikati ya kupotoshwa kwa Maandiko mengi sana. Lakini kanisa lenye nguvu, lenye kushinda limejengwa juu ya ufunuo kwa hiyo tunaweza kumtarajia Mungu kufunua kweli Yake kwetu. Hata hivyo, hakika huhitaji ufunuo juu ya ubatizo wa maji. Uko papo hapo ukikukodolea macho usoni. Je! ingewezekana katika muda mfupi sana kwa mitume kuongozwa vibaya kutoka kwenye amri ya moja kwa moja ya Bwana kubatiza katika Jina la Baba na Mwana na Roho Mtakatifu na halafu uwakute katika kutotii makusudi? Wao walijua hilo Jina lilikuwa ni lipi, na hakuna hata mahali pamoja katika Maandiko ambapo wao walibatiza katika njia nyingine yo yote nje ya Jina la Bwana Yesu Kristo. Akili ya kawaida ingekwambia ya kwamba Kitabu cha Matendo ni kanisa katika matendo, na kama wao walibatiza namna hiyo, basi hivyo ndivyo inavyopasa kubatiza. Sasa kama ukifikiria hilo ni zito, unafikiri nini juu ya jambo hili? Mtu ye yote ambaye hakuwa amebatizwa katika Jina la Bwana Yesu alipaswa arudie kubatizwa tena.

Matendo 19:1-6: “Ikawa, Apolo alipokuwa Korintho, Paulo akiisha kupita kati ya nchi za juu, akafika Efeso: akakutana na wanafunzi kadha wa kadha huko, akawauliza, Je! mlipokea Roho Mtakatifu tangu mlipoamini? Wakamjibu, La, hata kusikia kwamba kuna Roho Mtakatifu hatukusikia. Akawauliza, Basi mlibatizwa kwa ubatizo gani? Wakasema, Kwa ubatizo wa Yohana. Paulo akasema, Yohana kweli alibatiza kwa ubatizo wa toba, akiwaambia watu wamwamini Yeye atayekuja nyuma yake, yaani, Kristo Yesu. Waliposikia haya wakabatizwa kwa Jina la Bwana Yesu. Na Paulo alipokwisha kuweka mikono yake juu yao, Roho Mtakatifu akaja juu yao; wakaanza kunena kwa lugha na kutabiri.” Hivyo ndivyo ilivyo. Watu hawa wazuri huko Efeso walikuwa wamesikia juu ya Masihi ajaye. Yohana alikuwa amemhubiri. Wao walikuwa wamebatizwa wapate ondoleo la dhambi zao, wakitazamia MBELE wapate kuja kumwamini Yesu. Lakini sasa ilikuwa ni wakati wa kuangalia NYUMA kwa Yesu na kubatizwa ili kupata ONDOLEO la dhambi. Ilikuwa ni wakati wa kumpokea Roho Mtakatifu. Nao walipobatizwa katika Jina la Bwana Yesu Kristo, Paulo aliweka mikono yake juu yao na Roho Mtakatifu akaja juu yao.

Loo! hao watu wapendwa huko Efeso walikuwa ni watu wazuri; na kama mtu ye yote alikuwa na haki ya kujisikia salama, wao walijisikia. Angalia umbali waliokuwa wamekuja. Walikuwa wamesafiri wakafikia umbali wa kumkubali Masihi ajaye. Walikuwa tayari kumpokea Yeye. Lakini huoni ya kwamba ingawa walifanya hivyo walikuwa wamemkosa? Alikuwa amekuja na akaondoka. Walihitaji kubatizwa katika Jina la Bwana Yesu Kristo. Walihitaji kujazwa Roho Mtakatifu.

Kama umebatizwa katika Jina la Yesu Kristo, Mungu atakujaza na Roho Wake. Hilo ni Neno. Matendo 19:6 ambapo tulisoma ilikuwa ni kutimizwa kwa Matendo 2:38, “Tubuni, mkabatizwe *kila mmoja* wenu katika Jina la Yesu Kristo mpate ondoleo la dhambi zenu, nanyi mtapokea kipawa cha Roho Mtakatifu.” Mnaona, Paulo, kwa Roho Mtakatifu, alisema yale yale Petro aliyosema kwa Roho Mtakatifu. Na lililosemwa HALIWEZI kubadilishwa. Halina budi kuwa vile vile tangu Pentekoste mpaka yule wa mwisho kabisa aliyeteuliwa

amebatizwa. Gal. 1:8, “Lakini ijapokuwa sisi, au malaika wa mbinguni, atawahubiri ninyi injili yo yote isipokuwa hiyo tuliowahubiri, na alaaniwe.”

Sasa baadhi yenu ninyi watu wa Umoja mnabatiza makosa. Mnabatiza kwa ajili ya kuzaliwa upya kama kwamba kuzamishwa majini huwaokoa. Kuzaliwa upya hakuji kwa njia ya maji; ni kazi ya Roho. Yule mtu ambaye kwa Roho Mtakatifu alitoa ile amri, “Tubuni mkabatizwe kila mmoja wenu katika Jina la Bwana Yesu,” hakusema ya kwamba maji yalileta kuzaliwa upya. Yeye alisema ilikuwa tu ni ushuhuda wa “dhamiri safi mbele za Mungu.” Ilikuwa ni hayo tu. I Petro 3:21, “Mfano wa mambo hayo ni ubatizo unaotuokoa sisi pia siku hizi (siyo kuwekea mbali uchafu wa mwili, bali jibu la dhamiri safi mbele za Mungu,) kwa kufufuka Kwake Yesu Kristo.” Ninaamini jambo hilo.

Kama mtu ye yote analo wazo lo lote la uongo ya kwamba historia inaweza kuthibitisha ubatizo wa maji katika njia nyingine yo yote mbali na Jina la Bwana Yesu Kristo, ningekushauri usome historia na ujionee mwenyewe. Ifuatayo ni kumbukumbu ya kweli ya Ubatizo uliofanyika huko Rumi 100 B.K. na ukatolewa tena katika Gazeti la TIME la tarehe 5 Disemba, 1955. “Shemasi akainua mkono wake, naye Publius Decius akaingilia kwenye mlango wa mahali pa kubatizia. Marcus Vasca muuza kuni alikuwa amesimama katika kile kidimbwi maji yamemfikia kiunoni. Alikuwa anatabasamu wakati Publius alipokuwa akipita katika kidimbwi akaja akasimama karibu naye. ‘Credis?’ akauliza. ‘Credo,’ akajibu Publius. ‘Ninaamini ya kwamba wokovu wangu unatoka kwa Yesu aliye Kristo, Ambaye alisulubishwa chini ya Pontio Pilato. Nikafa pamoja Naye kusudi nipate Uzima wa Milele.’ Ndipo akasikia mikono yenye nguvu ikimshikilia huku yeye akijiachilia kuanguka kinyumenyume katika kile kidimbwi, ndipo akasikia sauti ya Marcus kwenye sikio lake— ‘Nakubatiza katika Jina la Bwana Yesu’—huku maji baridi yakimfunika.”

Hadi mpaka ile kweli ilipopotea (na haikurudi mpaka wakati huu wa mwisho—hii ni kutoka Nikea mpaka mwisho wa karne hii) walibatiza katika Jina la Bwana Yesu Kristo. Lakini umerudi. Shetani hawezi kuuzuia ufunuo wakati Roho anataka kuutoa.

Naam, kama kungalikuweco na Miungu watatu, ungaliweza kubatiza kweli kwa Baba fulani, na Mwana fulani, na Roho Mtakatifu fulani. Lakini ule UFUNUO ALIOPEWA YOHANA ulikuwa kwamba KUNA MUNGU MMOJA na Jina Lake ni BWANA YESU KRISTO, nawe unabatiza kwa Mungu MMOJA na mmoja tu. Hiyo ndiyo sababu Petro alibatiza jinsi alivyobatiza pale Pentekoste. Ilimbidi awe mwaminifu kwa ufunuo ambao ulikuwa, “Basi nyumba yote ya Israeli na wajue yakini, ya kwamba Mungu amemfanya YESU HUYO, mliyemsulibisha, kuwa BWANA NA KRISTO PIA.” Huyu hapo, “BWANA YESU KRISTO.”

Kama Yesu ni Bwana na Kristo ‘PIA,’ basi Yeye (Yesu) ni, na hawezi kuwa mwingine ila “Baba, Mwana, na Roho Mtakatifu” katika Nafsi MOJA aliyedhihirishwa katika mwili. SI “Mungu katika nafsi tatu, utatu uliobarikiwa,” bali ni MUNGU MMOJA, NAFSI MOJA yenye sifa tatu kuu, yenye afisi tatu zinazodhihirisha sifa hizo. Sikilizeni jambo hilo tena. Yesu yuyu huyu ni Bwana na Kristo “PIA.” Bwana (Baba) na Kristo (Roho Mtakatifu) ni Yesu, kwa sababu Yeye (Yesu) ni wote WAWILI (Bwana na Kristo).

Kama hilo halituonyeshi ufunuo wa kweli wa Uungu, hakuna kitakachotuonyesha. Bwana SI mwingine; Kristo SI mwingine. Huyu Yesu ndiye Bwana Yesu Kristo—MUNGU MMOJA.

Filipo siku moja alimwambia Yesu, “Bwana, utuonyeshe Baba na itatutosha.” Yesu akamwambia, “Mimi nimekuwapo pamoja nanyi siku hizi zote wewe usinijue? Aliyeniona Mimi amemwona Baba, basi wewe wasemaje, Utuonyeshe Baba? Mimi na Baba Yangu ni Mmoja.” Nilinukuu hilo siku moja na bibi fulani akasema, “Hebu kidogo, Bw. Branham, wewe na mke wako ni mtu mmoja.”

Nikasema, “Si kwa namna hiyo.”

Akasema, “Ati nini?”

Kwa hiyo nikamwambia, “Je! unaniona?”

Akasema, “Naam.”

Nikasema, “Unamwona mke wangu?”

Akasema, “La.”

Nikasema, “Basi umoja huo ni wa aina tofauti, kwa kuwa Yeye alisema, Ukiniona Mimi, unamwona Baba.”

Nabii alisema ya kwamba ingekuwako nuru wakati wa jioni. Katika wimbo imeandikwa:

“Kutakuwako nuru wakati wa jioni,
Njia ya kwenda utukufuni hakika
mtaiona,
Katika njia ya maji, hiyo ndiyo nuru
leo,
Ukizikwa katika Jina la thamani la
Yesu.
Vijana kwa wazee, tubieni dhambi
zenu zote,
Roho Mtakatifu hakika ataingia
ndani.
Nuru ya jioni imekuja—
Ni kweli kwamba Mungu na Kristo
ni mmoja.”

Si muda mrefu sana uliopita nilikuwa ninazungumza na Rabi Myahudi. Akaniambia, “Ninyi Mataifa hamwezi kumkata Mungu katika vipande vitatu na kumpa Myahudi. Tunajua vizuri zaidi kuliko hivyo.”

Nikamwambia, “Hivyo ndivyo ilivyo hasa Rabi, hatumkati Mungu katika vipande vitatu. Unaamini manabii, sivyo?”

Akasema, “Bila shaka ninawaamini.”

“Je! unaamini Isaya 9:6?”

“Naam.”

“Huyo nabii alikuwa akinena habari za nani?”

“Masihi.”

Nikasema, “Masihi atakuwa na uhusiano gani na Mungu?”

Akasema, “Atakuwa Mungu.”

Nikasema, “Hiyo ni kweli.” Amina.

Huwezi kumweka Mungu katika nafsi tatu ama sehemu tatu. Huwezi kumwambia Myahudi ya kwamba kuna Baba fulani, na Mwana fulani, na Roho Mtakatifu

fulani. Yeye atakwambia upesi sana mahali wazo hilo lilipotoka. Wayahudi wanajua kanuni hii ya imani ilianzishwa kwenye Baraza la Nikea.

Si ajabu wao wanatudhihaki kama makafiri.

Tunanena juu ya Mungu asiyebadilika. Wayahudi wanaamini jambo hilo pia. Lakini kanisa lilimbadilisha Mungu wake asiyebadilika kutoka MMOJA kuwa WATATU. Lakini nuru inarudi katika wakati wa jioni. *Ni ajabu jinsi gani ya kwamba ukweli huu umekuja katika wakati ambapo Wayahudi wanarudi Palestina.* Mungu na Kristo ni MMOJA. Yesu huyu ni BWANA NA KRISTO PIA.

Yohana alikuwa na ufunuo, na YESU ndiye aliyekuwa Ufunuo huo, Naye amejionyesha Mwenyewe papa hapa katika Maandiko—MIMI Ndiye Aliyekuwako, Aliyeko na Atakayekuja, Mwenyezi. Amina.

Kama ufunuo umekupita, angalia juu na umtafute Mungu uupate. Hivyo ndivyo tu utakavyoupata. Ufunuo hauna budi kutoka kwa Mungu. Hauji kwa karama ya maarifa ya kawaida, ya kibinadamu, bali ni kwa karama ya Roho. Unaweza hata kuyakariri Maandiko, na ingawa jambo hilo ni jambo zuri sana, hilo halitafaa kitu. Haina budi kuwa ni ufunuo kutoka kwa Mungu. Inanenwa katika Neno ya kwamba hakuna mtu anayeweza kusema ya kwamba Yesu ndiye Kristo ila kwa Roho Mtakatifu. Huna budi kumpokea Roho Mtakatifu na ndipo, na ndipo tu, Roho anapoweza kukupa ufunuo ya kwamba Yesu ndiye Kristo: Mungu, Yule Mtiwa Mafuta.

(Kimetolewa kutoka kwa *Maelezo ya nyakati Saba za Kanisa*)

SWAHILI

©2007 VGR, ALL RIGHTS RESERVED

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

www.branham.org

Ilani ya haki ya kunakili

Haki zote zimehifadhiwa. Kitabu hiki kinaweza kuchapishwa kwa matbaa ya nyumbani kwa matumizi ya kibinafsi ama kusambaza, bila malipo, kama chombo cha kuitangazia Injili ya Yesu Kristo. Kitabu hiki hakiwezi kikauzwa, kunakiliwa kwa wingi, kuwekwa kwenye mtandao, kuhifadhiwa kikatolewe tena, kufasiriwa katika lugha zingine ama kutumiwa kuomba fedha bila idhini halisi iliyoandikwa moja kwa moja kutoka Voice Of God Recordings®.

Kwa habari zaidi ama kwa vifaa zaidi, tafadhali wasiliana na:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org